

04 DEC 1997

Dewan-Kediaman

ABU HASSAN PERJELAS PENGUBAHSUAIAN RM5 JUTA KEDIAMAN RASMI

Oleh: Abdul Aziz Harun

SHAH ALAM, 4 Dis (Bernama) -- Menteri Besar Selangor, Datuk Abu Hassan Omar hari ini menitikkan air mata ketika memberi penjelasan kepada Dewan Undangan Negeri berhubung pengubahsuaian kediaman rasminya yang berharga RM5 juta dengan mengatakan bahawa jika diberi pilihan beliau lebih rela tinggal di rumah peribadinya di Ampang Jaya.

"Saya dan keluarga saya tidak ghairah untuk tinggal di kediaman rasmi Menteri Besar Selangor, saya berasal dari keluarga yang miskin," katanya.

Beliau berkata soal berhubung kediaman rasminya sebagai Menteri Besar Selangor tidak pernah menjadi keutamaan kepadanya sejak beliau memegang jawatan itu Jun lepas.

Katanya apabila Menteri Besar yang lama, Tan Sri Muhammad Haji Muhd Taib meletak jawatan, beliau hanya dilantik sebagai Menteri Besar yang baru kira-kira satu setengah bulan kemudian yang menyebabkan banyak kerja berhubung pentadbiran negeri tertanggung yang perlu dibereskannya.

"Bila saya ditawarkan jawatan itu oleh Perdana Menteri, Datuk Seri Dr Mahathir Mohamad, saya tidak ambil endah atau ambil kira sama ada saya akan tinggal di kediaman rasmi MB ataupun tidak," katanya ketika menggulung perbahasan belanjawan di Dewan Undangan Negeri di sini.

Selasa lepas, Dewan itu diberitahu bahawa kediaman rasmi Menteri Besar baru sahaja diubahsuai dengan belanja RM5 juta dan sejak dua hari lepas isu itu menjadi tajuk muka depan beberapa akhbar.

Abu Hassan berkata pengubahsuaian itu pada mulanya telah dipersetujui oleh Muhammad semasa menjadi Menteri Besar dengan peruntukan RM3.5 juta.

"Saya dan keluarga saya sudah tinggal di Ampang Jaya sejak lebih 20 tahun dan kami selesa di sana. Dalam usia 57 tahun untuk berpindah ke kediaman baru bukanlah satu keutamaan saya, tetapi protokol, tradisi dan komitmen yang memaksa sesiapa yang menjadi Menteri Besar untuk tinggal di kediaman rasmi," katanya.

Sebelum menjadi Menteri Besar, Abu Hassan adalah menteri Kabinet persekutuan.

"Itu sebabnya saya serahkan perkara berhubung pengubahsuaian kediaman rasmi MB kepada ahli profesional, itupun semasa saya nampak kosnya antara RM4.5 juta dan RM5 juta, saya rasa susah hati juga, jumlahnya agak tinggi," katanya.

Menurutnya, beliau sebaliknya meminta tempoh sebelum menyatakan persetujuannya berhubung jumlah yang diperuntukkan bagi pengubahsuaian itu sehingga dibincangkan oleh Mesyuarat Majlis Kerajaan Negeri.

Abu Hassan berkata beliau sendiri pada mulanya mengusulkan supaya kediaman itu dijadikan sebagai rumah tetamu kerajaan negeri dan beliau lebih rela berulang alik ke pejabat dari kediamannya di Ampang Jaya (dekat Kuala Lumpur) atau mencari rumah lain.

"Dalam mesyuarat itu semua ahli, malah ketua-ketua jabatan sudah diminta pendapat dan setiap orang daripada mereka bersetuju sebulat suara. Dan rumah itu nanti bukannya atas nama untuk Datuk Abu Hassan, tapi atas nama Menteri Besar Selangor," katanya.

"Keadaan ekonomi ketika itu baik, saya ada laporkan perkara itu kepada Perdana Menteri, Datuk Seri Dr Mahathir Mohamad tetapi tidak sempat kepada timbalannya, Datuk Seri Anwar Ibrahim. Dia sibuk dan sayapun sibuk. Saya fikir PM menyampaikan perkara itu kepada timbalannya," katanya.

Beliau berkata sejak beliau dilantik menjadi Menteri Besar pada 6 Jun, beliau hanya melawat rumah kediaman itu sebanyak dua kali sahaja disebabkan

tugasnya yang memerlukan beliau berada di kediaman itu.

Abu Hassan berkata dalam soal itu kerajaan negeri tidak pernah takut kerana kerajaan tidak pernah melakukan apa-apa penyelewengan dan bersedia disoal siasat oleh Ketua Audit Negara atau Badan Pencegah Rasuah pada bila-bila masa.

"Kita tidak ada apa yang hendak dilindungi, kita bersikap terbuka, 'accountable' dan sedia disiasat," katanya.

Abu Hassan berkata peratus perbelanjaan untuk pengubahsuaian itu juga adalah adil dan memadai memandangkan kediaman itu tidak pernah dibuat sebarang pengubahsuaian besar sejak 24 tahun lepas.

Beliau berkata RM169 juta telah diperuntukkan bagi pembangunan dan belanja mengurus di bawah Menteri Besar dan Setiausaha Kerajaan Negeri pada tahun ini dan RM5 juta untuk pengubahsuaian itu adalah kira-kira 2.5 peratus daripada peruntukan itu.

"Dengan ini, saya mengaku dan mengambil tanggungjawab penuh terhadap perkara berhubung pengubahsuaian kediaman rasmi Menteri Besar Selangor," katanya. -- BERNAMA

AZH NMO